

Tanto restaurant na Aruba y ningun tin monopolio

Mi a lesa ayer a di clientenan na Corsow cu a detecta un **cacalaca matros**, mocha den nan plato di cuminda na restaurant. Ora cu nan a reclama, ta zundra y maltrato nan a ricibi.

Cuanto cos no a yega di pasa den restaurantnan na Aruba cu mi a bishita ultimo 50 aña.

Mi restaurant favorito tabata Shanghai na San Nicolas y **porkchop** di New York Restaurant, tempo cu un **chop seuy** y un **porkchop** tabata 2,00 florin pa plato.

Awendia ta esun cu tin na San Nicolas y su sucursal Prome y Nada na Sun Plaza ta mi favorito y den chines, un cu ta menciona Juan Boei.

Di esnan banda di hotelnan, esun di Mister Rafi Wilson ta tops y pa pisca y carni, dunami Beni su Hana.

E ambiente y e servicio ta masha importante pa mi.

Mi a yega di hayami den restaurantnan cu mi a puntra mi mes, con nan por keda opera?

Mi no kiermeen cu tin labamento di placa of algo malo pasando.

Tin di e restaurantnan cu ni e paña di mesa nan no sa laba, corda placa.

Cu ta costa hopi pa mancha un restaurant, esey ta berdad pero importante ta tambe pa satisfice e necesidadnan basico di clientenan.

Mi no kier sinta pa come y cu speakernan ta cla pa habri mi tambu di orea for di otro, of hayami den un baño cu ta net bon pa hinca un baki yama "**bèster**" den dje y nada mas.

Mi kier cuminda decente cu no ta inclui "**muestra di cabey**" di e kokki.

RESTAURANT CU SHOW GRATIS

Tin lugarnan cu ta ser yama restaurantnan di familia, pasobra bo no por drenta sin topa cu siquiera un miembro di familia eyden, of diferente familia, of "**familianan di muskita**".

Tin di e restaurantnan cu ta promove "**come saludable**" pesey tur ora cu funcionarionan di Gezondheidsdienst yega, e restaurant tin cu paga un multa "**saludable**" pa estado higienico di su cushina.

No ta tur ora tampoco cu bo ta haya loke bo a paga pe, pasobra tin biaha bo ta haya mas cu bo a paga pe.

Bo ta haya un show di "**cacalaca bulado**" cu ta bula rond, sin cu bo ta paga pa e show aki.

Tin restaurant den cual e kokki ta surdo.

Esun cu a sirbibo na mesa ta grita e kokki asina duro cu piloto di cualquier avion di Tiara Air, cu ta bulando eybanda, ta scuche.

Tin ora nan ta usa idioma cu bo no ta comprende: "**chinkauwsung, jingsangkwaï, tiramafayochong, wancoke**".

Naturalmente nan kier meen: "**Un stoba crioyo cu funchi, banana, batata cu sauce special, y un coke, pa e cliente indian gordo mahos**".

Nos mester comprende cu e gritamento di bo ordo pa e kokki scucha no ta djis un forma pa nan comunica cu otro.

E ta bon promocion pasobra tur hende por tende cu e sauce ta special.

Pero esey ta e unico propaganda cu e restaurantnan aki ta haci como promocion pasobra nan no ta haya suficiente cliente pa paga aviso.

Tin di nan caminda servicio no ta existi.

Si bo kier un glas di awa, e manera mas facil pa bo logra esaki ta pa cende e paña di mesa na candelá.

Awa ta yega mes ora.

Tin propietario cu lo no kibra cabez, pasobra nan lo prefera pa e restaurant kima por completo ya cu nan ta scapa hopi placa sino nan lo mester a paga un persona, pa haci tal.

Con nan ta saca placa?

Hopi a dicidi di pone algun mucha muher netchi no-arubano tras di toonbank pa papia dushi cu clientenan masculino, y kizas bay keiro despues di trabao.

Na lugar di come, e cliente ta bebe y bebe y paga di mas despues.

Pa cara di e "**mosasita**" e no tin cunez cu 18 florin a bira 43 florin na momento di paga.

Mosasista ta ricibi su 25 florin extra, y riba dje tambe un propina di 25 florin.

Pafo e cliente ta para despues, canto di caminda cu duim na laira, pidiendo lift pa bay cas.

Otronan doñonan cu no por paga un of mas "**mosasita**" ta tene gasto abao.

Esakinan pa economisa, desde 1970 nan no a cambia tayo, ni glasnán ni forki, cuchu ni cuchara, ni paña di mesa.

Ultimo biaha cu nan a cambia of pone un rol di papel di WC den baño tabata tempo cu "**Joel Pelon**" ainda tabata tin cabey riba su cabez.

RESTITUCION DI BELASTING

Tin di e restaurantnan cu ta emplea familiarnan.

Papa ta cushina, **mama** ta sinta na caha di placa, **yiù muher** ta sirbi cliente y **yiù homber** ta laba tayo y weanan.

E **primo** ta traha riba bukinan di negoshi.

Mi ta mira e **yiù homber** y e **primo** ta papia caba:

PRIMO: "**Tende Tung, bo tata no mester paga belasting e aña aki. E ta haya un restitucion**".

TUNG: "**Un restitucion? Kico esey ta? Ta algo cu nos ta pone den cuminda como specerij?**"

PRIMO: "**No, mi ta papiando di restitucion di belasting. Loke mi a haci ta kita bo salario y asina a resulta cu nos no a haci ganashi, ni pa paga trahador**".

TUNG: "**Salario? Cua salario? Loke mi ta gana ta 2 florin pa ora pa mi cumpra sigaria y cu ta ni mitar salario minimo**".

PRIMO: "**Tene bo voz abao....., bo ruman muher ta capaz di tende y bin pidi pa aumento**".

Mi no ta papiando aki di cierto tipo di restaurant, esta restaurant chines.

E ta pasa den tur sorto di restaurant na mundo: chines, indio italiano, colombiano, peruano, Arubano, venezolano etc.

Esaki ta muestra cu ora ta papia di come bon y saludable, ningun restaurant tin monopolio.

Net ayer mi a lesa di e "**restaurant favorito**" di un cliente cu riba dialuna e cuminda dushi y saludable a resulta di ta "**mucho salo**".

Esey ta parti di e mala suerte cu bo ta core un dia den cualquier restaurant..

No tin nada mihor cu bo cuminda di cas.

Juby Naar